



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

01.10.2021թ.

**Ո Ր Ո Շ ՈՒ Մ  
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ  
ՔՆՆՈՂ ԱՆՁԻ  
թիվ ԱՑ-ԼՕ-2021/211**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի  
Քարտուղարությամբ՝ Ռ. Մկրտչյանի

Պատվիրատու՝ «Հայկական ատոմային էլեկտրակայան» ՓԲԸ  
Մասնակից՝ «Կա ընդ Կո Թրայդ» ՍՊԸ

Մասնակցությամբ՝  
«Կա ընդ Կո Թրայդ» ՍՊԸ-ի ներկայացուցիչ՝ Ա. Պարանյանի,

Գնման ընթացակարգի ծածկագիրը և առարկան՝  
«ՀԱԷԿ-ԳՀԱՊՁԲ-130-21» ծածկագրով գնանշման հարցման ընթացակարգ,  
մալուխների, մալուխային պատրաստածքների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ քննող անձ), ուսումնասիրելով Հայաստանի Հանրապետության ֆինանսների նախարարության կողմից 24.08.2021թ.-ի թիվ 26/26-1/13524-2021 գրությամբ «Կա ընդ Կո Թրայդ» ՍՊԸ-ին (այսուհետ նաև՝ Մասնակից) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը,

## Պ Ա Ր Ձ Ե Ց

### **1. Գործի նախապատմությունը.**

ՀՀ ֆինանսների նախարարությունը, «Հայկական ատոմային էլեկտրակայան» ՓԲԸ-ի 18.08.2021թ.-ի E/40/2186-21 գրության հիման վրա, 24.08.2021թ.-ին «Կա ընդ Կո Թրայդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին (Գ. Ներսիսյանին) գործը մակագրվել է 24.08.2021թ.-ին:

Հիմք ընդունելով ՀՀ ֆինանսների նախարարի 25.08.2021թ.-ի թիվ 450-Ա Բողոքներ քննող անձ՝ Գ. Ներսիսյանին 2020-2021թ.-երի աշխատանքային տարվա ամենամյա արձակուրդ տրամադրելու մասին հրամանը, ընթացակարգի քննությունը 06.09.2021թ.-ին փոխանցվել է Բողոքներ քննող անձ Լ. Օհանյանին:

08.09.2021թ.-ին [www.gnumner.am](http://www.gnumner.am) կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ԱՅ-ԼՕ-2021/211 համարի ծածկագիրը:

15.09.2021թ.-ին և 24.09.2021թ.-ին նշանակվել և հրավիրվել են նիստեր:

Գործի քննությունն ավարտվել է 15.09.2021թ.-ին և Բողոքներ քննող անձի որոշման հրապարակման օր է նշանակվել 24.09.2021թ.-ին:

### **2. «Հայկական ատոմային էլեկտրակայան» ՓԲԸ-ի ներկայացրած փաստերը և դիրքորոշումը.**

«Հայկական ատոմային էլեկտրակայան» ՓԲԸ-ն 18.08.2021թ. E/40/2186-21 գրությամբ դիմել է ՀՀ ֆինանսների նախարարությանը՝ հայտնելով հետևյալը.

««ՀԱԷԿ» ՓԲԸ կարիքների համար՝ «մալուխներ, մալուխային պատրաստվածքներ» ձեռքբերելու նպատակով «ՀԱԷԿ-ԳՀԱՊՁԲ-130/21» ծածկագրով կազմակերպված գնման ընթացակարգի գնահատող հանձնաժողովի 23.07.2021թ. №4 արձանագրության (որոշման) համաձայն, թիվ 4 և 5 չափաբաժիններով նախատեսված «մալուխի և հաղորդալարի»

մատակարարման նպատակով ընտրված մասնակից է ճանաչվել «Կա ընդ Կո Թրայդ» ՍՊԸ-ն:

Անգործության ժամկետի ավարտից հետո 2021թ. օգոստոսի 2-ին «Կա ընդ Կո Թրայդ» ՍՊԸ-ին ուղարկվել է պայմանագրի նախագիծ, առաջարկելով «Գնումների մասին» ՀՀ օրենքի 36-րդ հոդվածով սահմանված ժամկետում և կարգով որակավորման և պայմանագրի ապահովումների հետ միասին, կից գրությամբ, ներկայացնել «ՀԱԷԿ» ՓԲԸ:

«Գնումների մասին» ՀՀ օրենքի 36-րդ հոդվածի 3-րդ կետով սահմանված 10 աշխատանքային օրվա ընթացքում «Կա ընդ Կո Թրայդ» ՍՊԸ-ն չի ստորագրել պայմանագիրը և պարզապես չի ներկայացրել որակավորման և պայմանագրի ապահովումները:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀԱԷԿ-ԳՀԱՊՁԲ-130-21» ծածկագրով հայտարարված գնման ընթացակարգի շրջանակներում «Կա ընդ Կո Թրայդ» ՍՊԸ-ի տվյալները՝ համապատասխան հիմքերով:

Պատվիրատուն 03.09.2021թ.-ի թիվ E/40/2345-21 հայտնել է նաև հետևյալը.

«Տեղեկացնում ենք Ձեզ, որ «Հայկական ադոմային էլեկտրակայան» ՓԲԸ կողմից, սեփական կարիքների համար մալուխների, մալուխային պատրաստվածքների ձեռք բերման նպատակով հրապարակվել է «ՀԱԷԿ-ԳՀԱՊՁԲ-130/21» ծածկագրով գնման ընթացակարգ, որին ի թիվս մյուս մասնակիցների մասնակցության հայտ է ներկայացրել նաև «Կա ընդ Կո Թրայդ» ՍՊԸ-ն:

23.07.2021թ. թիվ 4 արձանագրությամբ «Կա ընդ Կո Թրայդ» ՍՊԸ-ն ճանաչվել է հաղթող մասնակից 4-րդ և 5-րդ չափաբաժինների մասով և վաստակել մալուխների և մալուխային պատրաստվածքների մատակարարման իրավունք: Հիմք ընդունելով «Գնումների մասին» ՀՀ օրենքի 36-րդ հոդվածը անգործության ժամկետի ավարտից հետո 02.08.2021թ. մասնակցին ուղարկվել ենք պայմանագրի նախագիծ և առաջարկել ենք այն կնքել 10 աշխատանքային օրվա ընթացքում՝ որակավորման ապահովման և պայմանագրի ապահովման հետ միասին մուրքագրել «ՀԱԷԿ» ՓԲԸ-ի փաստաթղթաշրջանառության համակարգ:

16.08.2021թ. մասնակիցը բանավոր հրաժարվել է պայմանագիրը ներկայացնելուց՝ ինչից հետո 17.08.2021թ. մասնակցի էլեկտրոնային փոստին ուղարկվել է հարցում՝ (Հարգելի մասնակից, քանի որ 16.08.2021թ. վերջացել է Ձեր ՀԱԷԿ-ԳՀԱՊՁԲ-130/21-01/221

ծածկագրով պայմանագիրը ներկայացնելու վերջնաժամկետը, առաջարկում ենք Ձեզ հետադարձ պատասխանով հաստատել պայմանագիրը ստորագրելուց հրաժարվելու փաստը: Կամ եթե փոստային առաքման միջոցով ուղարկել եք կնիքված և ստորագրված պայմանագիրը ապա ներկայացնել փյալ փաստը հաստատող փոստային առաքման կտրոնը): Պատասխան չստանալուց հետո «ԱԷԿ» ՓԲԸ-ն № E/40/2186-21 առ 18.08.2021թ. ֆինանսների նախարարություն է ուղարկել գրություն՝ պայմանագիրը ստորագրելուց հրաժարվելու վերաբերյալ:

Պայմանագիրը բերելու վերջնաժամկետից հետո՝ փոստային առաքման միջոցով ստացել ենք «Կա ընդ Կո Թրայդ» ՍՊԸ-ի կողմից ուղարկված նամակը հետևյալ պարունակությամբ՝ պայմանագրի երկու բնօրինակ, երկու որակավորման ապահովում: Պայմանագրի ապահովումը բացակայում է:

Հարգելի բողոք քննող անձ, ի պատասխան 01.09.2021թ. ուղարկված նամակի Ձեզ ենք ներկայացնում հետևյալ փաստաթղթերը՝

- Հայփոստի միջոցով ստացած նամակի երկու կողմերը,
- Պայմանագիրը,
- Որակավորման ապահովումը,
- 17.08.2021թ. մասնակցի էլեկտրոնային փոստին ուղարկված նամակը:»:

### **3. «Կա ընդ Կո Թրայդ» ՍՊԸ-ի ներկայացրած փաստարկները և դիրքորոշումը.**

Բողոքներ քննող անձը 29.06.2021թ.-ին գրությամբ դիմել է «Կա ընդ Կո Թրայդ» ՍՊԸ-ին՝ հնարավորություն տալով ՀՀ ֆինանսների նախարարության կողմից 24.08.2021թ.-ի թիվ 26/26-1/13524-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը, ստանալով կարծիք հայտնելու վերաբերյալ գրությունը, ինչպես նաև ծանուցված լինելով հրավիրված նիստերի տեղի, օրվա և ժամի մասին, ներկայացել է հրավիրված նիստին:

Մասնակիցը 31.08.2021թ.-ին ներկայացվելով ընթացակարգի վերաբերյալ գրավոր դիրքորոշում հայտնել է հետևյալը.

««ԱԷ ընդ ԿՈ Թրայդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով ՀՀ գնումների հետ կապված

բողոքներ քննող անձ Գ. Ներսիսյանի վարույթում նախաձեռնված թիվ ԱՅ-ՆԳ-2021/238 ընթացակարգի հիմքերի վերաբերյալ ներկայացվում են հետևյալ նկատառումները.

«ԿԱ ընդ ԿՈ Թրայդ» ՍՊԸ-ն մասնակցության հայտ է ներկայացրել «ՀԱԷԿ» ՓԲԸ-ի կարիքների համար հայտարարված «ՀԱԷԿ-ԳՀԱՊՁԲ-130/21» ծածկագրով գնանշման հարցման ընթացակարգին /այսուհետ նաև Ընթացակարգ/:

Ընթացակարգի գնահատող հանձնաժողովի 23.07.2021թ. տեղի ունեցած նիստի թիվ 4 արձանագրության «ԿԱ ընդ ԿՈ Թրայդ» ՍՊԸ-ն Ընթացակարգի 4-5-րդ չափաբաժնի մասով ճանաչվել է ընտրված մասնակից և նույն արձանագրությամբ որոշել անգործության ժամկետի ավարտից հետո ընտրված մասնակիցներին պայմանագիր կնքելու առաջարկ ներկայացնել:

«ԿԱ ընդ ԿՈ Թրայդ» ՍՊԸ-ին պայմանագիր կնքելու մասին ծանուցումը և պայմանագրի նախագիծը ուղարկվել է 02.08.2021թ., համապատասխանաբար վերջնաժամկետ է սահմանվել 16.08.2021թ. ներառյալ:

Հաշվի առնելով, որ «ԿԱ ընդ ԿՈ Թրայդ» ՍՊԸ-ի գործունեության (գտնվելու վայրի) հասցեն ք. Երևանն է, իսկ Պատվիրատուն գտնվել է Արմավիրի մարզում, ք. Մեծամորում, ապա ՍՊԸ-ն սահմանված ժամկետի վերջին օրը 16.08.2021թ. փոստային առաքման միջոցով, ստորագրած պայմանագիրը և կից փաստաթղթերը՝ օրենքով սահմանված կարգով ներկայացրել է պատվիրատուին /համապատասխան ապացույցը կցվում է/:

Ընթացակարգի գնահատող հանձնաժողովի կողմից ՀՀ ֆինանսների նախարարությանը ուղղված գրություն համաձայն «ԿԱ ընդ ԿՈ Թրայդ» ՍՊԸ-ն 4 և 5-րդ չափաբաժնի մասով զրկվել է պայմանագիր կնքելու իրավունքից /ըստ ՀՀ ֆինանսների նախարարությանը ուղղված գրության «ԿԱ ընդ ԿՈ Թրայդ» ՍՊԸ-ն սահմանված ժամկետում կնքված պայմանագիրը և որակավորման-պայմանագրի ապահովումը չի ներկայացել «ՀԱԷԿ» ՓԲԸ-ին/:

«Գնումների մասին» ՀՀ օրենքի (այսուհետ նաև Օրենք) 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

բ. որպես ընտրված մասնակից հրաժարվել է պայմանագիր կնքելուց:

Օրենքի 36-րդ հոդվածի 3-րդ մասը սահմանում է, որ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետք նաև Կարգ) 32-րդ կետի 14-րդ ենթակետի համաձայն՝ ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

«Նորմատիվ իրավական ակտերի մասին» ՀՀ օրենքի 31-րդ հոդվածի 2-րդ մասի համաձայն փարհներով, ամիսներով կամ օրերով հաշվարկվող ժամկետների ընթացքն սկսվում է այն

«Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ կետի համաձայն ... մինչև ժամկետի վերջին օրվա ժամը 24:00-ն կապի կազմակերպությանը հանձնված փաստաթղթերը համարվում են ժամկետում հանձնվածով:

Ինչպես արդեն հայտնել ենք, «ԿԱ ընդ ԿՈ Թրայդ» ՍՊԸ-ն մասնակցության հայտ է ներկայացրել «ՀԱԷԿ» ՓԲԸ-ի կարիքների համար հայտարարված «ՀԱԷԿ-ԳՀԱՊՁԲ-130/21» ծածկագրով գնանշման հարցման ընթացակարգին:

Ընթացակարգի գնահատող հանձնաժողովի 23.07.2021թ. փեղի ունեցած նիստի թիվ 4 արձանագրության համաձայն «ԿԱ ընդ ԿՈ Թրայդ» ՍՊԸ-ն Ընթացակարգի 4 և 5-րդ չափաբաժնի մասով ճանաչվել է ընտրված մասնակից և նույն արձանագրությամբ որոշել անգործության ժամկետի ավարտից հետո ընտրված մասնակիցներին պայմանագիր կնքելու առաջարկ ներկայացնել:

«ԿԱ ընդ ԿՈ Թրայդ» ՍՊԸ-ին պայմանագիր կնքելու մասին ծանուցումը և պայմանագրի նախագիծը ուղարկվել է 02.08.2021թ., համապատասխանաբար վերջնաժամկետ է սահմանվել 16.08.2021թ. ներառյալ :

«ԿԱ ընդ ԿՈ Թրայդ» ՍՊԸ-ն 16.08.2021թ. փոստային առաքման միջոցով, ստորագրած պայմանագիրը և կից փաստաթղթերը՝ օրենքով սահմանված կարգով ներկայացրել է պատվիրատուին:

Բողոքներ քննող անձին խնդրում ենք նկատի ունենալ, որ հաշվի առնելով, որ «ԿԱ ընդ ԿՈ Թրայդ» ՍՊԸ-ի գործունեության (գտնվելու վայրի) հասցեն ք. Երևանն է, իսկ Պատվիրատուն գտնվել է Արմավիրի մարզում, ք. Մեծամորում, ապա ՍՊԸ-ն այդ պատճառով է որոշում կայացրել ստորագրած պայմանագիրը և կից փաստաթղթերը՝ օրենքով սահմանված կարգով ներկայացրել է պատվիրատուին փոստային առաքման միջոցով:

Իսկ արդեն Ընթացակարգի գնահատող հանձնաժողովի կողմից ՀՀ ֆինանսների նախարարությանը ուղղված գրություն համաձայն «ԿԱ ընդ ԿՈ Թրայդ» ՍՊԸ-ն 4 և 5 չափաբաժնի մասով զրկվել է պայմանագիր կնքելու իրավունքից /ըստ ՀՀ ֆինանսների նախարարությանը ուղղված գրության «ԿԱ ընդ ԿՈ Թրայդ» ՍՊԸ-ն սահմանված ժամկետում կնքված պայմանագիրը և որակավորման-պայմանագրի ապահովումը չի ներկայացել «ՀԱԷԿ» ՓԲԸ-ին/:

Եվ այսպես, գնումների հետ կապված բողոքներ քննող անձի ուշադրությունն ենք դարձնում հետևյալ կարևորագույն հանգամանքի վրա, այն է.

1. Այսպիսով, «ԿԱ ընդ ԿՈ Թրայդ» ՍՊԸ-ն, խստիվ պահպանելով Օրենքի 36-րդ հոդվածի 3-րդ մասի պահանջները, պայմանագիր կնքելու մասին ծանուցումը և պայմանագրի նախագիծը ստանալուց (02.08.2021թ.) հետո 10 աշխատանքային օրվա ընթացքում (մինչև 16.08.2021թ. ներառյալ), այն է 16.08.2021թ. փոստային առաքման միջոցով, ստորագրած պայմանագիրը և պայմանագրի ապահովումը օրենքով սահմանված կարգով ներկայացրել է պատվիրատուին /համապատասխան ապացույցը կցվում է/, սակայն գնահատող հանձնաժողովը արձանագրել է, որ «ԿԱ ընդ ԿՈ Թրայդ» ՍՊԸ-ն զրկվել է պայմանագիր կնքելու իրավունքից, այն հիմքով, որ «ԿԱ ընդ ԿՈ Թրայդ» ՍՊԸ-ն սահմանված ժամկետում կնքված պայմանագիրը և որակավորման-պայմանագրի ապահովումը չի ներկայացել Պատվիրատուին /տես՝ ՀՀ ֆինանսների նախարարությանը ուղղված գրություն/:

Հարկանշական է, որ 02.08.2021թ. «ՀԱՅՓՈՍ» ՓԲԸ-ի միջոցով Պատվիրատուին է ուղարկել կնքված պայմանագիրը ինչն էլ ապացուցում է այն հանգամանքը, որ «ԿԱ ընդ ԿՈ Թրայդ» ՍՊԸ-ն չի հրաժարվել պայմանագիր կնքելուց, ավելին, օրենքով թույլատրելի եղանակով Ընկերությունը ստորագրված պայմանագիրը ներկայացրել է պատվիրատուին, սակայն պատվիրատուն անտեսելով վերոհիշյալը որոշել է զրկել «ԿԱ ընդ ԿՈ Թրայդ» ՍՊԸ-ին գնումների մասին ՀՀ օրենսդրությամբ երաշխավորված պայմանագիր կնքելու իրավունքից:

Մինչդեռ «Նորմատիվ իրավական ակտերի մասին» ՀՀ օրենքի 32-րդ հոդվածի 3-րդ կետի համաձայն ... մինչև ժամկետի վերջին օրվա ժամը 24:00-ն կապի կազմակերպությանը հանձնված փաստաթղթերը համարվում են ժամկետում հանձնվածով: Իսկ ինչպես արդեն նշել ենք, «Գնումների մասին» ՀՀ օրենքի 36-րդ հոդվածի 3-րդ կետը սահմանում է, որ ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո 10 աշխատանքային օրվա ընթացքում, պետք է ստորագրի և պատվիրատուին ներկայացնի այդ պայմանագիրը, ինչը փոխադրվում կատարել է:

Բողոքներ քննող անձին խնդրում ենք նաև նկատի ունենալ, որ պայմանագիրը Պատվիրատուին ներկայացվել է նաև սահմանված ժամկետում, այն է վերջին 10-րդ օրը:

Պետք է փաստել, որ «Նորմատիվ իրավական ակտերի մասին» ՀՀ օրենքի 31-րդ հոդվածի 2-րդ մասի համաձայն փարհներով, ամիսներով կամ օրերով հաշվարկվող ժամկետների ընթացքն սկսվում է այն օրացուցային փարվա, ամսվա, ամսաթվի կամ վրա հասած իրադարձությանը

Այսպիսով, ըստ «Նորմատիվ իրավական ակտերի մասին» ՀՀ օրենքի 31-րդ հոդվածի 2-րդ մասի հաշվարկվող ժամկետների ընթացքն սկսվում է այն օրացուցային ամսաթվի հաջորդ օրվանից, որով որոշված է դրա ժամկետի սկիզբը:

Պայմանագրի նախագիծը ուղարկվել է մասնակցին 02.08.2021թ., հաջորդ օրվանից հաշվարկված վերջին 10-րդ աշխատանքային օրը ստացվում է 16.08.2021թ., որ օրն էլ ՍՊԸ-ն «ՀԱՅՓՈՍ» ՓԲԸ-ի միջոցով Պատվիրատուին է ուղարկել կնքված պայմանագիրը կից փաստաթղթերով:

Գտնում ենք, որ նման փաստական հանգամանքներում «ԿԱ ընդ ԿՈ Թրայդ» ՍՊԸ-ին չի կարող վերագրվել պայմանագրից կնքելու հրաժարում, քանի որ, ինչպես արդեն նշվել է, 16.08.2021թ. «ՀԱՅՓՈՍ» ՓԲԸ-ի միջոցով Պատվիրատուին է ուղարկել կնքված պայմանագիրը:

Հատկանշական է նաև այն փաստը, որ նույն փաստական հանգամանքներով՝ գնումների հետ կապված բողոքներ քննող անձի կողմից արդեն իսկ քննվել է նույնաբովանդակ բազմաթիվ ընթացակարգեր, որոնք բողոքներ քննող անձի կողմից մերժվել են և մասնակիցները չեն ներառվել գնումների գործընթացին մասնակցելու իրավունք չունեցող մասնակիցների ցուցակում /օրինակ՝ ՍՅ-ՆԳ-2021/162/:

Ելնելով վերոնշյալ փաստերից ու փաստական հանգամանքներից խնդրում ենք «ԿԱ ընդ ԿՈ Թրայդ» ՍՊԸ-ին չվերագրել «Գնումների մասին» ՀՀ օրենքի 6-րդ հոդվածի 1-ին



մասի 6-րդ կետով նախատեսված որևէ խախտում, և վերջինիսի չներառել «Գնումների գործընթացին մասնակցելու իրավունք չունեցող մասնակիցների ցուցակում»:

Մասնակիցը 22.09.2021թ.-ին ներկայացված դիրքորոշման լրացմամբ հայտնել է հետևյալը.

«Թիվ ՍՅ-ԼՕ-2021/211 ծածկագրով ընթացակարգի քննության վերաբերյալ նշանակված նիստի ընթացքում բողոքներ քննող անձի կողմից հարցադրում եղավ կապված պայմանագրի ապահովումը՝ պայմանագրի ն որկավորման ապահովման հետ միասին փոստային առաքման միջոցով ծրարում չկցելու վերաբերյալ:

Վերը նշված փաստի առթիվ հայտնում ենք, որ Ընկերության մոտ պահպանվել է պայմանագրի ապահովման բնօրինակից արված սկանավորված օրինակը, ինչպես նաև փոստային առաքման միջոցով ուղարկված լինելու փաստը հավաստող համապատասխան անդորրագիրը, որտեղ նշվում է նաև ծրարի քաշը և եթե հնարավորություն լինի Պատվիրատուն առձեռն բողոքներ քննող անձին ներկայացնի ծրարը ամբողջական փաթեթով, ապա մեր ընկերությունը պատրաստ է սեփական ուժերով ներկայացնել սարք, որով հնարավորություն կստանանք նորից ստուգել ծրարի քաշը ն տանել համեմատական: »:

#### **4. ՍՅ-ԼՕ-2021/211 ընթացակարգի քննության համար էական նշանակություն ունեցող փաստերը.**

Սույն գործի քննության համար էական նշանակություն ունեցող փաստերի համաձայն՝

i. «Հայկական ատոմային էլեկտրակայան» ՓԲԸ-ի (այսուհետ նաև՝ Պատվիրատու) կողմից մալուխների, մալուխային պատրաստածքների ձեռքբերման նպատակով 08.07.2021թ.-ին հայտարարվել է «ՀԱԷԿ-ԳՀԱՊՁԲ-130-21» ծածկագրով գնանշման հարցման ընթացակարգ ընթացակարգ (այսուհետ նաև՝ Ընթացակարգ), որին մասնակցելու նպատակով հայտ է ներկայացրել նաև «Կա ընդ Կո Թրայդ» ՍՊԸ-ն:

ii. «Կա ընդ Կո Թրայդ» ՍՊԸ-ն մասնակցության հայտի թիվ 1 հավելվածով՝ գնանշման հարցման ընթացակարգին մասնակցելու դիմում-հայտարարությամբ, հայտարարել և հավաստել է, որ բավարարում է «ՀԱԷԿ-ԳՀԱՊՁԲ-130-21» ծածկագրով գնման ընթացակարգի իրավերով սահմանված մասնակցության իրավունքի պահանջներին և պարտավորվում է ընտրված մասնակից ճանաչվելու դեպքում, իրավերով սահմանված կարգով և ժամկետում, ներկայացնել գնային առաջարկի չափով որակավորման ապահովում:

iii. Ընթացակարգի գնահատող հանձնաժողովի (այսուհետ նաև՝ Հանձնաժողով) 23.07.2021թ.-ի նիստի թիվ 4 արձանագրության համաձայն՝ Հանձնաժողովը որոշել է Ընթացակարգի 4-րդ և 5-րդ չափաբաժինների մասով ընտրված /հաղթող/ մասնակից ճանաչել «Կա ընդ Կո Թրայդ» ՍՊԸ-ին:

iv. 26.07.2021թ.-ին պայմանագիր կնքելու նպատակով գնումների պաշտոնական տեղեկագրում՝ [www.gnumner.am](http://www.gnumner.am) կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն և սահմանվել է անգործության ժամկետ՝ 5 օրացուցային օր:

v. Պատվիրատուն 02.08.2021թ.-ին Մասնակցի էլ. փոստի հասցեին ներկայացնելով «ՀԱԷԿ-ԳՀԱՊՁԲ-130-21» ծածկագրով պայմանագրի նախագիծը՝ խնդրել է պայմանագրի նախագիծը և առաջարկը ստանալուց հետո տասն աշխատանքային օրվա ընթացքում ներկայացնել պայմանագիրը՝ այն կից գրությամբ մուտքագրելով «Հայկական ատոմային էլեկտրակայան» ՓԲԸ-ի փաստաթղթաշրջանառության համակարգ:

18.08.2021թ.-ին [www.gnumner.am](http://www.gnumner.am) կայքում հրապարակված «ՀԱԷԿ-ԳՀԱՊՁԲ-130/21» ծածկագրով գնման ընթացակարգի արդյունքում կնքված պայմանագրի մասին հայտարարության համաձայն՝ Ընթացակարգը՝ 4-րդ և 5-րդ չափաբաժինների մասով, հայտարարվում է չկայացած՝ պայմանագիր չկնքվելու հանգամանքով պայմանավորված:

Մասնակցի կողմից տրամադրված փոստային կտրոնի /առաքանի՝ թիվ 5296, կոդը՝ RG034040896AM/ համաձայն՝ «Կա ընդ Կո Թրայդ» ՍՊԸ-ն 16.08.2021թ.-ին պատվիրված նամակով «Հայկական ատոմային էլեկտրակայան» ՓԲԸ-ին (հասցե՝ ք. Մեծամոր) ուղարկել է առաքանի:

[www.haypost.am](http://www.haypost.am) կայքի ուսունասիրության արդյունքում պարզվել է, որ փոստային կտրոնի /առաքանի՝ թիվ 5296, կոդը՝ RG034040896AM/ համաձայն՝ առաքանին հանձնվել է հասցեատիրոջը՝ 23.08.2021թ.-ին, ժամը 14:30-ին:

## **5. Բողոքներ քննող անձի հիմնավորումները և եզրահանգումը.**

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 24.08.2021թ.-ի թիվ 26/26-1/13524-2021 գրությամբ «Կա ընդ Կո Թրայդ» ՍՊԸ-ին գնումների գործընթացին մասնակցելու իրավունք չունեցող մասնակիցների

ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» և «բ» ենթակետերի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, և որպես ընտրված մասնակից հրաժարվել է պայմանագրի կնքելուց:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագրի կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագրի կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ և 13-րդ ենթակետերի համաձայն՝ ընտրված մասնակցին պայմանագրի կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը: Ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Նույն կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին

հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Կարգի 50-րդ կետի համաձայն՝ ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով, եթե ներկայացվել է նաև որակավորման ապահովումը հիմնավորող փաստաթուղթը: Ընդ որում, ապրանքների գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից ներկայացված և գնահատող հանձնաժողովի կողմից բավարար գնահատված առաջարկի:

Վերոնշյալ դրույթների համակարգված վերլուծության արդյունքում, Բողոքներ քննող անձը փաստում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծն, որակավորման և պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում ներկայացված գնային առաջարկի չափով որակավորման ապահովում, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում, ինչպես նաև չներկայացնելով պայմանագրի ապահովում, վերջինս զրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը, ինչպես նաև վերջինիս գործողությունները (անգործությունը) գնահատվում են որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ երկու տարի ժամկետով, քանի որ խախտել է գնման գործընթացի շրջանակում ստանձնած պարտավորությունը՝ հրավերով սահմանված կարգով և ժամկետում չներկայացնելով որակավորման ապահովում, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը, ինչպես նաև պատվիրատուին չներկայացնելով պայմանագրի օրինակը և/կամ ապահովումը զրկվել է պայմանագիր կնքելու իրավունքից:

Սույն գործի փաստերի հիման վրա՝ Բողոքներ քննող անձն արձանագրում է, որ «Հայկական ատոմային էլեկտրակայան» ՓԲԸ-ի կողմից մալուխների, մալուխային պատրաստածքների ձեռքբերման նպատակով 08.07.2021թ.-ին հայտարարված «ՀԱԷԿ-ԳՀԱՊՁԲ-130-21» ծածկագրով գնանշման հարցման ընթացակարգին մասնակցելու նպատակով հայտ ներկայացրած «Կա ընդ Կո Թրայդ» ՍՊԸ-ն Հանձնաժողովի 23.07.2021թ.-ի նիստի թիվ 4 արձանագրության համաձայն՝ ճանաչվել է ընտրված /հաղթող/ մասնակից:

27.05.2021թ.-ին պայմանագիր կնքելու նպատակով գնումների պաշտոնական տեղեկագրում՝ [www.gnumner.am](http://www.gnumner.am) կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն և սահմանվել է անգործության ժամկետ՝ 5 օրացուցային օր: Պատվիրատուն, 03.06.2021թ.-ին Մասնակցին ներկայացնելով «ՀԱԷԿ-ԳՀԱՊՁԲ-130-21» ծածկագրով պայմանագրի նախագիծը, խնդրել է տասն աշխատանքային օրվա ընթացքում ներկայացնել պայմանագիրը, որակավորման և պայմանագրի կատարման ապահովումները:

18.06.2021թ.-ի նիստի թիվ 3 արձանագրությամբ արձանագրվել է, որ Մասնակցի կողմից սահմանված ժամկետում չի ներկայացվել պայմանագրի, ինչպես նաև պայմանագրի ու որակավորման ապահովումները և Հանձնաժողովը որոշել է «Կա ընդ Կո Թրայդ» ՍՊԸ-ի կողմից ներկայացված հայտը գնահատել անբավարար և մերժել:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նշված իրավանորմերի վերլուծության հիման վրա՝ Բողոքներ քննող անձն եզրահանգում է, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Ընդ որում, Բողոքներ քննող անձը հարկ է համարում փաստել, որ «Կա ընդ Կո Թրայդ» ՍՊԸ-ն մասնակցության հայտի թիվ 1 հավելվածով՝ գնանշման հարցման ընթացակարգին մասնակցելու դիմում-հայտարարությամբ, հայտարարել և հավաստել է, որ բավարարում է «ՀԱԷԿ-ԳՀԱՊՁԲ-130-21» ծածկագրով գնման ընթացակարգի հրավերով սահմանված մասնակցության իրավունքի պահանջներին և պարտավորվում է ընտրված մասնակից ճանաչվելու դեպքում, հրավերով սահմանված կարգով և ժամկետում, ներկայացնել գնային առաջարկի չափով որակավորման ապահովում:

Վերոնշյալներով պայմանավորված՝ Բողոքներ քննող անձը հանգում է այն եզրակացության, որ «Կա ընդ Կո Թրայդ» ՍՊԸ-ն, որպես ընտրված /հաղթող/ մասնակից, հրավերով սահմանված կարգով և ժամկետներում չներկայացնելով պայմանագիրը, որակավորման և պայմանագրի կատարման ապահովումները, խախտել է գնման

գործընթացի շրջանակում ստանձնած պարտավորություն, ինչպես նաև հրաժարվել է պայմանագիր կնքելուց:

Ուստի, հիմք ընդունելով «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթները, Մասնակցին պետք է ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

Անդրադառնալով «Կա ընդ Կո Թրայդ» ՍՊԸ-ի կողմից 16.08.2021թ.-ին պատվիրված նամակով «Հայկական ատոմային էլեկտրակայան» ՓԲԸ-ին՝ ք. Մեծամոր հասցեով առաքանու ուղարկմանը, ապա Բողոքներ քննող անձը հարկ է համարում արձանագրել, որ Մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու որոշում կայացնելու նպատակով գործի լուծման համար էական նշանակություն ունեցող բոլոր փաստերը պետք է պարզել ապացույցների հետազոտման և գնահատման միջոցով, որոնց հիման վրա Բողոքներ քննող անձը պարզում է գործին մասնակցող անձանց պահանջները և առարկությունները հիմնավորող, ինչպես նաև վեճի լուծման համար նշանակություն ունեցող այլ հանգամանքների առկայությունը կամ բացակայությունը:

Տվյալ պարագայում, Բողոքներ քննող անձը փաստում է, որ Մասնակիցը ներկայացրած դիրքորոշմամբ՝ չի ներկայացվել որևէ ապացույց առ այն, որ «Կա ընդ Կո Թրայդ» ՍՊԸ-ի կողմից 16.08.2021թ.-ին Պատվիրատուին ուղարկված առաքանիում առկա է եղել «ՀԱԷԿ-ԳՀԱՊՁԲ-130/21» ծածկագրով պայմանագրի կատարման ապահովումը:

Փաստերը, որոնք, օրենքի կամ նորմատիվ իրավական ակտերի համաձայն, պետք է հաստատվեն միայն որոշակի ապացույցներով, չեն կարող հաստատվել այլ ապացույցներով:

Հատկապես այն պարագայում, երբ Պատվիրատուն հայտնել է, որ պայմանագիրը բերելու վերջնաժամկետից հետո՝ փոստային առաքման միջոցով ստացվել է «Կա ընդ Կո Թրայդ» ՍՊԸ-ի կողմից ուղարկված նամակը, պայմանագրի երկու բնօրինակները, երկու որակավորման ապահովումները, իսկ պայմանագրի ապահովումը բացակայել է:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

## **Ո Ր Ո Շ Ե Ց**

1. ՀՀ ֆինանսների նախարարության կողմից 24.08.2021թ.-ի թիվ 26/26-1/13524-2021 գրությամբ «Կա ընդ Կո Թրայդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2021/211 ծածկագրով ընթացակարգը բավարարել:

2. «Կա ընդ Կո Թրայդ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ  
ԲՈՂՈՔՆԵՐ ՔՆՆՈՂ ԱՆՁ՝**



**ԼԵՎՈՆ ՕՀԱՆՅԱՆ**